

# L'iniziativa 1:12 ha charmalà blers votants a l'urna

Duas reacziuns – ina da la ps ed ina da la pld

■ (anr/vi) **Ils Svizzers refusan l'iniziativa per pajas gistas e cun gliez ina limitaziun da la relaziun da salaris entaifer in'interpresa. Jon Pult, il president da la ps grischuna, tutga tar il coc dals iniziants. El discorra tuttina dad ina «bella experientscha».** «Igl è stà in privilegi da vesair il process», di Jon Pult. El è stà da la partida cura che l'idea è naschida en il ravugl d'intgins paucs protagonistis dals Giuvens socialistis. Da lezzas uras n'avess el mai cret che l'iniziativa 1:12 – atgnamain in'idea per dapli giustia sociala – procura gia plirs mais avant la votaziun per debattas uschè chaliradas. L'emprim mument na savevan ils iniziants gnanca sche questa «tematica funcziunina en Svizra». Ier ha la mesadad dals votants fatg part da la votaziun. Quai mussia che l'iniziativa saja stada ina tematica che mobilischa e charmalia blers votants a l'urna, di Pult.

## Champagna intensiva dals adversaris

Ils iniziants n'hajan mai spetgà da gudar, ma cunzunt ils ultims mais hajan ins tuttina sperà da cuntanscher in meglier resultat, di Pult. Suentar la retschertga da l'october che aveva erui tuttina bleras vuschs pro e contra hajan ils adversaris intensivà la champagna. Naging n'avess pensà che l'iniziativa s'establischia e ch'ella vegnia prendida uschè seriusa, di Pult. Las dumondas cardinalas, sco per exempel en tge societad che nus vulaian viver, vegnian a restar er en l'avegnir sin l'agenda politica.



Ils Grischuns han refusà l'iniziativa 1:12 cun 20 637 cunter 46 246 vuschs.

KEYSTONE

## Desditga ad «ideas socialistas»

Da l'autra vart dal spectrum politic vegn il resultat dad ier valità sco desditga clera ad «ideas socialistas». «La populaziun n'haja betg sa laschà surmanar», di cusseglier naziunal Ruedi Noser (pld/ZH) a las medias svizras. Il resultat valia sco renconuschientscha dal model da success svizzer.

1500 interpresas n'avessan betg pudì

viver cun in «gea» ed avessan survegni problems. «Nus essan ids tar la populaziun ed avain mussà si las consequenzas d'in gea», di Noser. Tenor el è la tematica dals excess da paja uss liquidada. «Nus avain fatg correcturas adequatas.» I na dovria betg ulteriuras mesiras.

Ils Grischuns han refusà l'iniziativa cun 20 637 cunter 46 246 vuschs. 50 pertschient dals votants han vuschà.

## Co vai vinavant?

Suentar l'iniziativa Minder e l'iniziativa 1:12 n'è la debatta da paja anc betg a fin. Il 2014 vegn il votant a s'occupar vinavant da la tematica. L'iniziativa per pajas minimalas da l'uniun sindacala vegn en votaziun. Plinavant è vegnì inoltrà in'iniziativa per ina paja senza premissas per in e scadin.